

(1) حصص قصة عشق لا تنتهي Posts -

facebook.com/homs.syr.homs/posts/282842811751968

مروة الغميان تسرد رحلة اعتقالها داخل السجون السورية

اطلق سراحي من اعتقالي الأول يوم الجمعة 25 آذار الساعة 3 العصر من فرع الخطيب ... كان بابا بانتظاري من الصباح على باب الفرع .. كنت فرحانة و زعلانة بنفس الوقت ... فرحت أنني طلعت سالمة من عندهم .. لأنني ما كنت بتتوقع لحظة يلي دخلت ع الفرع أنني اطلع عايشة .. و كان سبب فرحي الأكبر أنني حققت حلمي و اشتعلت الثورة .. و كنت زعلانة على بابا لأنه كان كثير تعبان و تجربتي

مع الاعتقال كانت صعبة جدا عليه و كان على وشك الإنهيار .

رحنا على البيت و كانوا ماما و أخواتي بانتظاري ... ماما كان شكلها تعبانة كثير .. تحت عيونها أسود و حسيته كبرانة كثير من آخر مرة شفتها ... عانقتني و صارت تبيكي .. و أخواتي صاروا يبكوا .. لكن أنا ما بكيت .. ما قدرت أبكي ... يمكن كنت بحالة صدمة ... التجربة يلي مرقت فيها كان ألتأثير كبير على نفسيتي و لحد الآن ما انتهى ... كانت جديدة كلياً علي .. أول مرة بتعرض للضرب بوحشية .. أول مرة بتتوجهلي كلمات مهينة .. أول مرة بشوف شباب مثل الورود عم تتعذب بطريقة وحشية أمام عيوني .. سمعت أصوات رجال بالزنزانات المنفردة مضى عليهم شهور دون ما يخرجوا منها ... كنت أسمع عن اجرام و وحشية المخبرات السورية ... لكن المعاينة على الواقع غير السمع و أنا صبية عادية و بعيدة كل البعد عن هالاجرام و عن هالوحشية .. و بحياتي ما قربت على فرع أو حتى مخفر ... حتى الدوائر الحكومية كنت نادراً جداً أنني أدخلها و فجأة لقيت حالي بأكثر أقبية سوريا و وحشية و اجرام .. كانت تجربة قاسية علي من كل النواحي .. جسدياً و نفسياً و اجتماعياً ... للأسف مجتمعنا ما بيرحم .. و عنده أفكار خاطئة كثير بخصوص المرأة .. و بالبداية ما كانت موجودة عند العالم فكرة انه الاعتقال شرف و وسام بيفتخر فيه الحر .. كانت نظرتهم للبنات يلي بتدخل فرع مخبرات كثير سيئة و بشعة ... شفت هالنظرة بعيون كثير من الأشخاص للأسف .. و سمعت كثير لوم .. و تعرضت لكثير نقد ... لكن يلي كان يخفف عني هو بابا .. من أول يوم من اطلاق سراحي قلي : (أنا برفع راسي فيكي يا بنتي .. أنت نزلتي و كنت رافعة علم بلادك و هالشي بيشر فني و بشرفك .. و مو غلط يلي عملتيه .. كانت النساء على زمان الرسول عليه الصلاة و السلام و الصحابة تحارب و تجاهد بجانب الرجال .. و أنت عملتي واجبك تجاه وطنك) .. أنا لما سمعت حكيه ما عاد حكي الناس يهمني .. و أيقنت أنني على الطريق الصحيح .

أول شغلة عملتها بيوم اطلاق سراحي - من بعد الحمام طبعاً - فتحت الننت .. كنت مشتاقة كثير لأصحابي .. كنت بدي أعرف شو أخبار الثورة .. شو أخبار الأبطال يلي طلوعوا معي بـ 15-3 .. كنت بدي أعرف أيمنى موعد المظاهرة الجاية .. كان عندي كثير حكي و كثير أفكار بدي وصلها .. كنت فرحانة و بدي خير رفقاتي أنني ما استشهدت بالمظاهرة الأولى .. و لسه مستعدة أنه أستشهد بالمظاهرة الثانية ... و بعدها صرت أشتغل ع المخفي .. بسبب أنهم كانوا موقعيني المخبرات قبل ما يطلقوا سراحي على تعهدات بأني ما أتظاهر مرة ثانية أو أتعرض للنظام عن طريق الننت .. و كنت مراعية ظروف أهلي و زعلانة كثير ع الاذى يلي سببتهم ياه .

كبرت علاقاتي مع الثوار على الأرض .. و صارت نشاطاتي أكثر .. و وصلت لأهم الناشطين بدمشق و صرنا مع بعض ننظم و نحرك سير الثورة بدمشق .

بالشهر السادس وصلني خبر بأني مطلوبة من المخبرات من جديد .. كان تركي للبيت خطوة مهمة بهاد الوقت .. من بعدها صارت كل حياتي للثورة .. و صارت المخاطرة أكبر .. و بالرغم من هالشي ما كانت تصير مظاهرة بالشام إلا و كون فيها أو يكون أنا يد بالتخطيط ألتأثير .. كانت تمرق ايام نطلع فيها 3 مظاهرات بنفس اليوم .. و بعد ما نخلص المسانطع لشبي مكان و نخطط للمظاهرات الجاية .

كانت حياة الثورة رائعة .. كنت استمتع بكل لحظة فيها .. تعرفت على أكثر الشباب روعة بسوريا .. صارت علاقتي فيهم قوية مثل علاقتي بأخوتي .. كنا نخاف على بعض ونهتم ببعض و كأننا أخوات من أب و أم وحدة .. بالرغم من تنوع إنتماءاتنا و أديانا و توجهاتنا السياسية .. كنت حاسة أني يوم عن يوم عم قرب أكثر من حلمي و من هدفي بأنه سوريا تتحرر و ترجع الشام لعزها و تتطهر من يلي دنسوها و نعيش كلنا بحرية و كرامة ... كنا عم نعمل شي منحبه و مأمنين فيه و هالشي كان سبب استمرارنا رغم كل الصعوبات و الضغوطات يلي عم تتعرض لها الشام .

أجا رمضان .. و اتقدت فيه الثورة بالشام ... كان أحلى رمضان بيمرق علي ... المظاهرات كانت على أشدها .. و ضربات موجعة وُجِعت للأمن .. أشد الأماكن حساسية بالشام طلعت .. المالكي - المهاجرين - أبو رمانة - المزة .. طبعاً عدا الأماكن المتقدمة من قبل مثل الميدان والقابون والقدم يلي ما كانت تهذا ليل نهار ... ع التراويح و ع التهجد و على صلاة الفجر - الله محيي رجالك يا شام - و كان ختامها مسك بجامع الرفاعي ليلة القدر .

تطورت الأحداث على الصعيد السياسي .. و ببداية الشهر التاسع - ايلول - كان في ندوة سرية بالدوحة دعي عليها أبرز وجوه المعارضة السورية .. و كان بدهم مشاركة شبابية من النشطاء من الداخل .. و كان أسمي مطروح و وجهتلي دعوة ... فكرت كثير قبل ما أقبل .. و استشرت رفقاتي و طلبوا مني الحضور .. و قالولي : (أنت من الشارع و عندك الفرصة أنك توصلي صوتنا بصدق لأنك بتعرفي همومنا و مشاكلنا و الصعوبات يلي عم تواجهنا و من حقنا عليكى تكوني موجودة) ... أهلي بالبداية عارضوا ... لكن اصراري كان أقوى .

حضرت الندوة و تعرفت عليهم .. و بأخر يوم للندوة صار حديث طويل معهن و ما قدرت ما ابكي لأنهم ما كانوا عم يتفقوا و كان عندي أحساس أنهم مو حاسين بالدم المهدور و بوجع الشعب السوري و مو سمعانيين أنين امهات الشهداء و صرخات المعتقلين داخل أقبية المخابرات .

رجعت على سوريا و وجهتلي دعوة عن طريق أصدقائي لحضور مؤتمر هيئة التنسيق يلي صار بحلبون بريف دمشق .. حضرته أنا و عدد من الأصدقاء .. و كان سبب تواجدنا حرصاً منا على دعم جهود المعارضة وتوحيدها بالداخل و الخارج ... و رشحوا أسمي لكون معهم باللجنة المركزية المؤلفة من 80 عضو و كنت أنا و 24 ناشط آخر ضمن هذه اللجنة ممثلين عن حراك الشارع .

بهالفترة كان في تصعيد أمني كبير و تضيق على الناشطين .. تم اعتقال عدد كبير من النشطاء المقربين مني .. و صارت تحركاتي أصعب وازداد الوضع خطورة بالنسبة الي .. وزعت صورتي بمحلات و أكشاك المخابرات بالمهاجرين ((مكان بيتي)) و عمم أسمي على الحواجز .. و وصل لأهلي خبر بأنه النظام ناوي يصفيني بس لتهدا الأوضاع شوي .. و بعد رمضان كانت الثورة بالشام اخف شوي من قبل ... أهلي صاروا عايشين بكابوس ... كانت ماما عم تبكي ليل نهار ... بابا ما عاد داق طعم النوم .. صاروا يترجونني اني اطلع برا البلد .. لكن ما كنت رغبانة بهالشي ... لحد اليوم يلي واجهت فيه خطر الاعتقال مباشرة ... عملي الأمن كمين عند البيت يلي كنت متخبية فيه .. لقيت سيارة بيجو ستيشن بيضا و فيها عنصرين مخابرات و افقة على رصيف البناية ... ما قدرت أرجع ع البيت أو أخود غراضي منه .. أحد أصدقائي خباني ع بيته عند مرته ... صار تواجدي بسوريا شبه مستحيل .. و خصوصي بأني وجه معروف و من الصعب جدا علي التخفي .. و خصوصاً بالفترة الأخيرة كان نشاطي الميداني على أشده .. معظم ثوار الشام صارت بتعرفني ولو بالوجه بسبب تواجدي الدائم بالمظاهرات .. و طبعاً هالشي صار يجعل من عملي الميداني أصعب .. و بالنهاية اقتنعت أنه وجودي بسوريا خطر علي و على أصدقائي .. و قررت السفر .

طلبت المساعدة من أصدقائي بالدوحة بتأمين فيزا للسفر لعندهم .. و كان للدكتور حازم نهار و بعض الأصدقاء الفضل بمساعدتي بهالموضوع ... حجزت على طائرة الدوحة بتاريخ 30-9 .. كانت طيارتي ع الوحدة الضهر .. كنت مشيكة قبل بيوم على أسمي إذا كان موجود على الحدود .. و كان الرد سلبي و طمنوني أني فيني سافر من المطار من دون مشاكل .. كان يوم جمعة .. وصلني على المطار صديقي و زوجته .. و تركوني عند اخر نقطة قبل ما فوت لجوا .. كانوا عم يتصلوا فيني كل 10 دقائق للأطمأن علي ... وصلت لعند موظف الأمن حتى يختلي جوازي .. دق أسمي على الكمبيوتر و صار يطلع فيني بنظرات غريبة و هون أنا بلشت حس أنه في شي مو تمام .. بعد كم دقيقة قلتي : (تقضلي معي في مشكلة على اسمك) .. أنا هون عرفت أنه خلص اعتقلت .. مشيت معه و كنت عرفانة شو مستيني .. خلال سيرتي معه .. اتصل صديقي فيني .. و فوراً خبرته أني اعتقلت .. كانت صدمة عليه .. و تلبك و قلتي : (شو بدي أعمل !!) قلته يخبر بعض الأشخاص و يطمن بأني مو خايفة و إنه رب العالمين معي ... بلشنا ندخل ببمرات و يتغير المنظر علي .. المكان يلي اقتادني أله موظف الأمن كان شكله بتختلف عن بناء المطار .. كان يبشبه كثير فروع المخابرات و الوجوه الموجودة هونيك بنشبة بشكل كبير الوجوه يلي كنت شوفها بفرع الخطيب و وجوه الشبيحة يلي كانت

تطارنا بعد المظاهرات ... دخلت لعند الضابط .. و كنت بكامل هدوئي .. لأنني كنت حاطة ببالي احتمال أني اعتقل بالمطار .. قلي الضابط : (يا مروة عندك فكرة ليش المخابرات بالأمن العسكري و بفرع فلسطين طالبينك ؟) .. أنا جاوبت بكل براءة : (لاء) قلي : (اسمك وصل لعنا من ساعتين مع القوائم الجديدة) ... أخذوا مني أغراضي و عملوا فيهم ورقة و نزلوا شناتي من بعد ما صاروا بالطيارة ... و دخلوني لغرفة الإحتجاز ... و خلال هالفترة كان شعوري غريب ... أنا نفسي كنت مستغربة من حالي كثير .. كنت مبسوطة .. اي كان بداخلي سعادة لأنني ما كان بدي إني غادر سوريا و الله بيشهد علي بأني كنت طالعة على المطار و الحزن بقلي كبير .. ما كنت بدي أترك الشام و الثورة و أهلي و رفقاتي ... كان عازز علي جدا الفراق ... و لما اعتقلت شعرت بنوع من الراحة .. لأن الهم يلي كان راكبي راح ... و الاعتقال يلي كنت عم اهرب منه طوال شهور الأخيرة صار .. و ما عاد في شي أكبر من هيك ممكن يصير معي .. و صدقا ارتحت و أكثر شي ريحني أني ما غادرت أرض الوطن ... الضابط و العناصر استغربوا كثير موقفي .. لأن كانت الإبتسامه ما عم تفارق وجهي .. و سألني عنصر الأمن و نحنا رايعين غرفة الإحتجاز عن سبب هالإبتسامه .. جاوبته بكل صدق (ما كنت حابة أترك سوريا و هلاء ما عاد اتركها) ... رد علي العنصر (صدقيني رح تتمني أنك تركتها بس توصلني ع الأمن العسكري) .. و كمل حديثه و قال : (نحنا هون حبابين و هونيك ما رح يعاملوكي مثل ما نحنا عم نعاملك) ... أنا رديت عليه بإبتسامه و صمنت .. و رجعت قلي : (الغريب أنك مو خايفة) .. جاوبته : (أنا مالي عاملة شي لخاف) ... قلي : (ما عم صدق أنه صبية متلك بهالوجه البريء مطلوبه ليهك فروعة و لساتها بكامل هدوها و الإبتسامه مرسومة على وجهها ... شو يلي وصلك لهون !!) .. كمان رديت عليه بالصمت .

دخلت ع غرفة الإحتجاز و كان في بنت فلبينية محتجزة هونيك ... صارت تحاكييني و خبرتني أنو ألها من مبارح محتجزة و كانت تخدم بأحدى البيوت بالشام و صار معها مشكلة و هي ناوية ترجع بلدها ... زعلت عليها و على وضعها و حاولت و اسيتها .

كانت الساعة صارت بحدود 12 ظهرا لما دخلوني على غرفة الإحتجاز ... و ما بعرف ليش أصبت بالنعس الشديد .. و بما أنه كان لسه في وقت طويل من هون لتجي دورية المطار ع الساعة 6 تاخذني ع الأمن العسكري قررت اني نام ... و بالفعل نمت شي ساعتين و كنت نائمة بعمق .. يمكن ما غرقت بالنوم هيك من 3-4 أشهر ... من وقت ما تركت بيتي ... و لما صحيت لقيت الفلبينية كمان نائمة .. فقربت عليها و غطيتها .. بدخلت عنصر الأمن نفسه يلي كان عم يحاكييني و هو عم يوصلني ع غرفة الإحتجاز ... شافني عم غطي البنت .. و هون هو استغرب

و قلي : (ليش عم تغطيها ؟)

جاوبته : (حرام المكيف ممكن يأذيها)

قلي : (أنت إنسانه طبية و حنونة)

قلته : (و أنت أنسان طيب)

قلي : (أنت عم تضري البلد)

قلته : (أنا بدي مصلحة البلد و مصلحتك قبل مصلحتي)

قلي : (يا مسكينة رح تتعذبي كثير و رح تضوعي حياتك و شبابك بالسجن)

قلته : (فدى الحرية و فدى سوريا)

لما سمع كلمة "حرية" تغيرت ملامح وجهه و نهى الحديث و مشي .

قابلت بفترة احتجازي بالمطار ضابط ابن حلال غير يلي أخذ مني أغراضي .. لما شافني داخلة على قسم أمن المطار أجا لعندي و حاكاني و طمني أنه معي و رح يوصي العناصر و الضباط فيني و صار يطمني بأني رح أطلع من هالمشكلة و أني رح أرجع من بعد ما أخلوص من هالمشكلة و سافر من المطار ... كنت كثير ممنونة أله .. و كنت حاسة بأنه بداخله في شي من الألم من الوضع يلي سوريا فيه و بعيونه حزن كبير علي .

صارت الساعة 6 .. و وصلت دورية المطار يلي لازم تنزلني على الأمن العسكري .. اخذ منا الطريق حوالي 3 ساعات .. كانت عندهم محطات على الطريق قبل ما نوصل للأمن العسكري يلي بالمزة مقابيل الكارلتون .

وصلت على الأمن العسكري و طلعتوني على الطابق السادس .. و طبعا كان الإستقبال شتم و مسبات و بهادل من مستوى المخابرات السورية ... قعدوني بغرفة محقق درجة ثانية حوالي ربع ساعة و بعدها نقلوني لفرع ثاني ((ما عرفت شو أسمه)) .. بالفرع الثاني نزلوني 3 طوابق تحت الأرض و كان الفرع مليان معتقلين و كان في ضوطة كبيرة ... كان يوم جمعة و هالشي طبيعي يكون كل يوم جمعة .. المعتقلين يكونوا كتار و الفروعة بتغص فيهم ... وقفوني و وشي للحيط حوالي 10 دقائق .. و بعدها نقلوني لمنفردة ما فيها شباك و لا أي منفذ للهواء .. و كان على حيط المنفردة مكتوب بخط كبير " حرية " .. تأثرت بهالكلمة و كاني شفت المعتقل البطل و هو عم يكتبها ... بقيت بالمنفردة حوالي نص ساعة ... و بعدها دخل لعندي ضابط مخابرات من النوع الأول .. يعني مرتب و كبير بالعمر ((بالخمسينات)) .. و بلش معي مواعظ و لوم و من هالحكي الفاضي ... طبعا انا كنت التزم الصمت .. اعتقالي الأول و خبرتي بالثورة علمتني أنو المعتقل ما لازم يكبر راس معهم و لازم يلزم الصمت قدر المستطاع حتى يطلع بأقل خسائر و حتى ما يعطيهم أي معلومة أو يسلمهم أي خيط حتى يفتحوا معه التحقيق .

بعد 3 دقائق من المواعظ و التكلم على عظمة بشار "ربه" تركني .. و بعد ب 10 دقائق أجا عنصر و رجعتني على الأمن العسكري ... ما بعرف سبب هالخطوة الذكية منهم أنه جابوني على هالفرع ... بس هالشي أنا أستقدت منه بأني شفت هالأبطال و تأكدت أنه الثورة بالف خير .

رجعت ع الأمن العسكري و حطوني بزناة لحالي بنفس قسم الرجال ... ما بعرف ليش باعتقالي الأول و الثاني دائما ما يجمعوني مع المعتقلات !!

بعد نص ساعة دخلوني على غرفة محقق من بعد ما عصبولي عيوني .. و بدا معي المحقق تحقيق و كانت لهجته قاسية و عم يتبع معي أسلوب التشبيح بالتهديد بالتعذيب .

أكتشفت بعد دقائق من التحقيق أنه كان سبب البحث عني و جليبي هو رسالة بيني و بين ناشط تم اعتقاله مؤخرا ... محتوى هالرسالة كان عن تزويد الثوار بكميرات و أجهزة ثريا .. و الحلو بالموضوع أنه كان تاريخ هالرسالة بالشهر الخامس .. أنا هون اتضمنت أنهم ما بيعرفوا و لا 10% من نشاطي حين اعتقالي ... و هالشي عطاني الراحة النفسية و القوة ... لأن كان نشاطي بالشهر الخامس محدود جدا مقارنة بنشاطاتي الأخيرة .

طبعا انا اتبع معهم أسلوب البراءة و البنيت الطيبة المغرر فيها و المحبة للشهرة .. و أوحيتله بأني مجرد ناشطة على النت مو اكثر و هالشي كان بسبب أي أنشهرت بعد اعتقالي الأول .

صارت الساعة 11:30 المساء و قرر المحقق تكلمة التحقيق باليوم التالي .

ع الساعة 10 صباحا من يومي الثاني في الاعتقال استدعوني .. طبعا .. طلبوا مني حسابي على الفيس بوك ... عطيتهم الميل و الباسورد ... جربوا يفتحوه ما فتح معهم .. كانوا أصدقائي سكرولي ياه .. بلشوا بالتهديد و اتهموني بأني مو عطيتهم الباسورد صح ... و بعد محاولات عديدة أكتشفوا أنه ادارة الفيس بوك معطلة حسابي و هون هنن بلشوا يدركوا أي مو معتقلة عادية ... و بلشوا يغيروا طريقة معاملتهم معي ... صارت شوي أرقى .

من خلال التحقيق .. تفقد المحقق جواز سفري .. و أكتشف أي كنت بشهر أيلول بالدوحة .. و سألتني عن سبب تواجدي فيها .. خبرته أي كنت عم أحضر ندوة - تخيلوا مخابرات و الأمن العسكري و بيجهلوا أنه كان في ندوة بقطر للمعارضة .. علما أنه الندوة بعد إنتهاها تداولتها معظم وسائل الإعلام - و عرفوا مني أنه هالندوة كان ضيوفها المعارضين السوريين و من بعد ما عرفوا هالمعلومة تغير كل مسار التحقيق و انصب كل إهتمامهم على احداث الندوة و ما جرى فيها من نقاشات و أحداث .. طبعا انا هون ما حكيت الا المعلومات يلي كانت منشورة على صفحات الانترنت .

بهالأثناء انتشر خبر اعتقالي إعلاميا و على صفحات الانترنت .. و ورد الخبر على أهم القنوات الفضائية مثل الجزيرة و العربية .. و صارت أكثر من حملة لاطلاق سراحي .. و طبعا ما بنسى فضل الناشطين الحقوقيين مثل الدكتور "هيثم مناع" و الناشطين الفيس بوكيين يلي أطلقوا صفحات بأسمي و الناشطين على الأرض يلي أخرجوا مظاهرات تهتف بإطلاق سراحي .. كل هالأشياء ساعدتني كثير و أنا معتقلة .. بحيث منعتهم من إلحاق الأذى فيني و أجبرتهم على معاملتي باحترام ... تخيلوا أنه باليوم الثالث من اعتقالي حتى عرف المحقق أنه أنا " مروة الغميان " الفتاة يلي اعتقلت بأول يوم بالثورة جنب الجامع الأموي .. و سألتني باستغراب : (أنت بالننت يلي كانت لابسة العلم !!) قلنا : (أي أنا) ... و هون بلشوا المحققين أنهم يرسموا على مقابلة معي للإعلام السوري و يستغلوا شهرتي لمصلحتهم .

كانت ظروف اعتقال أفضل من اعتقالي الأول وأفضل من ظروف اعتقال غيري من النشطاء .. الشي يلي كان زاعجني و مأثقل علي هنن أهلي و رفقاتي و العالم يلي بتحبني .. لأني بعرف شو يعني يعتقل حدا مقرب منك و أديشه موقف صعب و أديش بيولد قلق و توتر و خصوصي على الأهل كنت قضي طوال الليل و أنا عم فكر بأهلي و كيف وضعهم و كنت عم لوم نفسي كثير لأني جد تعبتهم و خصوصي أنهم لسه ما نسيوا اعتقال الأول ... كانت ساعات الليل تمرق علي طويلة كثير .. لأني كنت لحالي .. كنت أسهر بهالليل و أنا عم أتأمل الحيطان و كتابات الأحرار يلي عليها .. كان في مجموعة نمل تمشي جنب البطانية يلي مفترشتها على الأرض .. وصل فيني اليأس ليلة حتى أنني صرت حاكيهم .. و لسخرية الأقدار كان حيط ززانتي على حيط ززانة رفقاتي و هنن عرفانين أنني معتقلة معهم بنفس المكان لأنهم لمحوني مرة ... كانوا يدقولي على الحيط .. لكن ما كنت أقدر رد .. لأنه ما معي شي دق فيه ... كانت ززانتي خاوية إلا من البطانية يلي كانت تختي ... كانوا هنن يلي يحطولي الأكل بالقصعة كل يوم .. و كانوا أكليين همي لأني ما كنت عم أكل .

{ طبعا هالشي عرفت فيه أنا من بعد ما طلعت و اطلق سراح واحد من الشباب يلي كانوا معتقلين معي و هو حكالي هالتفاصيل .. و خبرني كمان هالشب بأنه شاف أنني حاقرة على حيط الززانة بدبوسي

" يا ظلام السجن خيم ... أننا نهوى الظلام "

و هو كمل كتابة :

" ليس بعد الليل إلا ... فجر مجد يتسامى " . }

باليوم الخامس من اعتقالني كانت نفسي كثير تعبانة ... يلي كان تاعبني هم أهلي و بعدي عن جوي جو الحرية و هواها ... كانوا المحققين عم يتبعوا معي سياسة غسل الدماغ و كنت مضطرة جاريهم لأنه بالنهاية أنا بدي أطلع و عندي قناعة أنه المعتقل ما لازم يكبر راس جوا المعتقل ... كان كل حديثهم على بشار و ع نظامه الاصلاح و خطته العظيمة يلي ناوي بيني فيها سوريا ... و دائما دائما التلفزيون بغرف التحقيق مشغلينه على قناة الدنيا يلي بتجبلني العصبي ... كنت موصله لحد الإنهيار .. لحد ما الله بعثلي دفعة حرية قوتني و رفعتلي معنوياتي ... كنت بأحدى غرف التحقيق عم أستنى لياخدوني ع ززانتي ... دخلوا شب لعند المحقق .. و أول ما شفت هالشب عيوني برقت و رجعتلي الروح ... هالشب أول مرة بشوفه بس كان واضح من عيونه أنه حر حتى من قبل ما يحكي ولا كلمة .. دخل و جبلي معه رائحة الحرية ... من بعد حكيه مع المحقق عرفت انه اعتقل من مظاهرة بالهامة .. و واضح أنه آله سجل حافل بالحرية ... ألقت عيوني بعيونه و لغة العيون بلشت بينا و حسبت كأنه عرف بأني حرة مثله ... صدقا هالشب لما شفته حسبت كأنني بغربة صرلي سنين و فجأة شففت أخ الي ... ما بعرفه و لا بيعرفني لكن جمعتنا الحرية .. جمعنا حب الوطن ... لاحظ المحقق هالنظرات بينا .. و لمس مدى القوة و الإيمان يلي فيها .. و عرف أنها بتشكل خطر كبير عليه و على النظام يلي عم يدافع عنه و طلب من العنصر نقلي على غرفة تانية ... بس هالدقائق القليلة كانت كافية بأنها تشعل روح الحماس فيني .. و تدمر أثار سياسة غسل الدماغ و قناة الدنيا على نفسياتي .

صارحني المحقق بان اطلاق سراحي متوقف على مقابلة مع التلفزيون السوري .. و أنا ما كان فيني غير القبول بعرضه ... و تم الاعداد لهالمقابلة باسئلة و أجوبه هنن لفتوني ياه ... و طبعا كنت عم جاريهم فيها .

باليوم السادس جهزولي غرفة حتى أستعد فيها لإجراء المقابلة و بعثولي تيايبي على المصبغة و جابولي غدا جاهز و كانت الأمور ماشية تمام ... و طبعا كنت عم فكر أنه إذا ثمن خروجي هالمقابلة ما عندي مشكلة أي أجريها لأن بالأصل ما حدا بيصدق اعلامهم الكاذب و أي إنسان بفكر بعقله لو بشوف المقابلة رح يعرف أي أجريتها تحت الضغوط و ما حدا بيلوم معتقل على تصرفاته داخل فرع المخابرات ... بس يلي كان مثير أستغرابي هو غباء المخابرات .. انا ببساطتي و عفويتي قدرت اضحك عليهم مرتين ((باعتقالي الأول و الثاني)) لما أوهمتهم بانني اقتنعت بوجهة نظرهم و بأنه في مؤامرة تحاك على سوريا و في أجندة خارجية تتنفذ ... لكن يلي مخليني أتعجب بأنه المحققين يلي كانوا يحقوا معي كانوا مخضرمين و كبار بالعمر و كيف صدقوا أنني ممكن غير إيماني و مبادئي خلال كم يوم .. و ما فكروا أنه أنا لما اخترت أمشي بطريق الثورة كان هدفي الحرية و كنت متوقعة كل لحظة أنه أدفع حياتي ثمن لهذا الهدف و أنا و غيري ماشين بالطريق و حاملين روحنا على كفنا و مستمرين حتى النصر .. لما يكون الإنسان مؤمن بهدف و مستعد بضحي بحياته في سبيله ما في قوة بالأرض ممكن تسلبه هالإيمان أو تغير قناعاته ... لكن من بعد تفكير كبير اتضحلي أنه هنن ما عندهم إيماني و لا عندهم قضية و يلي ما بيعرف الإيمان بفكر أنه من السهل الإنسان يتخلى عن إيمانه و قضيته بالهياة .. و لأنه هنن مستعدين يبيعوا قضيتهم " بكاس عرق " بفكروا كل العالم بتغير مبادئهم مثلهم ... هاد الفرق بينا و بينهم و هاد سر قوتنا و سر ضعفهم .

صوّرنا المقابلة وكانت ممتازة برأي المحققين و على أساس أنني أطلع فوراً بعد إنتهاء التصوير ... قرب مني المحقق و قلبي : (في شخص مهم كثير لازم تقابليه هلاء ... كوني مستعدة) قلته : (ماشي) أخذني ع قسم معزول نسبياً عن الفرع لكنه بنفس البناء بس بيختلف جدا عنه من حيث الفخامة و الاهتمام و النظافة .. حسيت حالي داخلة على شي وزير .. ع الطريق خبرني المحقق أنه رح قابل " لواء الأمن العسكري " ... دخلت لعنده .. و بعد اللوم و الإستكار ألي أمرني أن أتعاون معهم بالإبلاغ عن نشطاء الثورة و تسليمهم إلى المخابرات ... ما كان مني إلا الموافقة لأن عدم موافقتي بتعني استمرار اعتقاله و عدم خروجي .

طلب اللواء من المحقق شريط المقابلة يلي صورته معي التلفزيون السوري و خبرني بأنهم ما رح يعرضوه .. و طلب مني استمراره على نفس النهج يلي أتبعته قبل ما يعتقلوني .. بما معناه أنني أرجع مارس نشاطي مع الثوار .. و خبرني أنني بقدر أعمل أي نشاط من دون خوف أن أتعرض لأي مسائلة من قبلهم .. و عرضوا علي أنهم يأمنولي بيت لأسكن فيه و قالوا لي حط المبلغ يلي بدي و يكون جاهز فوراً ... و طلبوا أن أقابل أحد المحققين بعد اطلاق سراحي حتى يعطيني موبايل و هالموبايل حصراً للتواصل معهم ... و عطاني العميد رقم موبايله الشخصي و مكتبه .

أطلق سراحي بتاريخ 6\11\2011 .. الساعة 10:30 المساء .. وصلوني لساحة الأمويين بسيارة العميد و من هونيك أخذت تكسي و رحت على المهاجرين على بيت أهلي .. طبعاً أهلي ما كان عندهم خبر بأني طالعة .. و كانت ماما و أحد أصدقائي خلال فترة اعتقاله عم يروحوا على فروعة المخابرات و يسألوا عني و أجوا مرتين على الأمن العسكري الفرع يلي كنت أنا فيه و نفولهم وجودي عندهم ... كانوا أهلي بلشوا بياسوا .. لأن ما تركوا فرع مخابرات بالشام إلا و راحوا عليه و ما حدا اعترف فيني .

وصلت ع بيت أهلي .. طلعت المفتاح و أنا أيدي عم ترجف .. فتحت الباب و دخلت ... أول وش شفته هو وش ماما ... ماما صارت تصرخ و تقول " مروة " ركدت عليها و عانقتها ... بابا بعد ما شافني ما عاد قدر يوقف .. قعد على الأرض و صار بيكي .. و بعدها سجد سجود شكر لرب العالمين .

نشرت خبر اطلاق سراحي على صفحة الحرية يلي عملولي ياها أصحابي .. و كل أتصلت و باركلي ... طلعتنا أنا و أهلي لنحتفل .. رحنا ع ست الشام يلي بكفروسوسة .. لحنونا بعض الأصحاب و كانت الفرحتهم كبيرة ... لكن أنا كانت فرحتي ناقصة .. كان في هم كبير راكبي .. كيف بدي أخلوص من المخابرات من دون ضرر .

تواصل معي العقيد و طلب مني ألتقي بالمحقق حتى يعطيني الموبايل .. و طبعاً رحت لقابله و أنا كثير خايفة ... كان الموعد بالشام ستي سنتر ... عطاني الموبايل و فيه شريحة .. و صار يتواصل معي من خلالها .

كان أول أمر من العقيد أنني نسق مع هيئة التنسيق الوطني و كون معهم بالمؤتمر الصحفي و ألقى البيان الختامي .. خبرته أنني رح نسق معهم .. و ثاني يوم ما رحت و لما سألتني خبرته أنني كنت تعبانة و معدتي و اجعتتي و طوال الليل مالي نايمة .

بنفس اليوم أتصل و صار بده أنني وصله لرفقاتي ... أنا هون حسيت حالي ما عاد فيني أهرب منه .. و اتخذت قرار بالسفر ... كانت مطروحة علي فكرة أنني أطلع تهريب على الأردن ... لكن كان وضع الأردن موجد مع اللاجئين بوقتها و كان لازم أنظر حتى يتغير الحال ... لكن ما كان عندي وقت .. أما بسلام رفقاتي أو برفض التعاون و هالشي ممكن يعرضني بأفضل الأحوال للاعتقال و بأسوء الأحوال للتصفية و صارت قبل الآن حالات تصفية مع النشطاء يلي طلوعوا و رفضوا التعاون .

تسكرت البواب بوشي .. و الوقت صار جدا حرج و لازم أخود قرار ... أخذت قرار و كان فيه كثير مخاطرة .. قررت أنني سافر عن طريق المطار للأردن و كنت حاطة إحتمال الاعتقال 90% .. فضلت اني اعتقل على أن خون الثورة و رفقاتي و كون متعاملة مع هالسفلة .. حجزت على الطيران الأردني و كانت رحلتي على الساعة 8:30 صباحاً بتاريخ 11\10\2011 ... رحت على المطار و عرفانة أنني راجعة على المعتقل و ما عاد أطلع منه إلا بعد إسقاط النظام ... وصلت على ختم الجوازات .. و كالعادة موظف الأمن تغيرت ملامح وشه و خبرني أنو في مشكلة على أسمي و لازم روح عند ضابط أمن المطار ... طبعاً و أنا داخلة على القسم الأمني بالمطار شافني العنصر نفسه يلي صار نقاش بيني و بينه بإحتجازي السابق و فوراً تذكرني و قلبي بإستغراب : (لك شو رجعت لنا !!) جاوبته : (أنني بدي سافر و رجعوا و قفوني علما أنا طلعت من الأمن العسكري و أطلقوا سراحي و ما عاد ألهم معي شغل ... و أنتوا هلاء رجعتوا و قفوني !!) ... أخذوني لعند ضابط أمن المطار و حكوله أنني احتجزت عندهم من 11 يوم و أطلق سراحي و لسه منع السفر موجود على أسمي ... قرر الضابط أنه يتصل بالفرع يلي كنت معتقلة فيه حتى يعرف إذا ممكن سافر أو لاء ... كانت الساعة حوالي 6:45 الصبح .. و أتصل الضابط و خبروه بالفرع أنهم أطلقوا سراحي و ما عاد في أمر بحث بأسمي ... أغلب الظن أن يلي رد على اتصال الضابط أمن المطار عنصر عادي من الأمن العسكري و

الضابط المسؤول بالأمن العسكري ما كان موجود لأن الوقت كبير و لسه الدوام ما بلش .. خبروني أنه بإمكانني السفر و ما علي مشكلة .. طبعاً ما بتتخلوا شعوري لما طارت الطائرة فيني .. و الله ما كنت مصدقة ... الحمد لله رب العالمين وقف معي و نجاني أنا و رفقاتي منهم .. ((و مكروا و مكر الله و الله خير الماكرين)) .

عاشت سوريا حرة أبية